

摘藻堂四庫全書薈要

史部

欽定四庫全書薈要

史部

通志卷一百七十八



詳校官員外郎臣楊世綸

欽定四庫全書薈要卷九千九十六

史部

通志卷一百七十八

宋右迪功郎鄭樵漁仲撰

逸傳第二

宗炳

從父弟
或之

沈道虔

孔淳之

周續之

戴顓

翟法賜

雷次宗

郭希林

劉凝之

龔祈

朱百年

關康之

辛普明
妻惠明

漁父

孫
緬



齊

褚伯玉

顧歡

盧度

杜京產

孔道徽

道徽父

明僧

紹

兄僧允

僧嵩

臧榮緒

宗測

吳苞

趙僧巖

孔

嗣

徐伯珍

妻幼瑜

沈麟士

庾易

劉虬

沈顗

梁

何點

兄求弟肩

阮孝緒

劉歊

王敬允歊族弟

許鄧郁

陶弘

景

諸葛璩

劉慧斐

范元琰

庾詵

子曼倩

張

孝秀

庾承先

陳

馬樞

後魏

睦夸

馮亮

李謐

鄭脩

隋

李士謙

崔廓

徐則

張文詡

鄭翻

宋

宗炳字少文南陽涅陽人也祖承宜都太守父繇之湘

鄉令母同郡師氏聰辯有學義教授諸子炳居喪過禮
為鄉閭所稱刺史舉秀才不就武帝既誅劉毅領荊州
問毅府諮議參軍田永曰今日何施而可永曰除其宿
釁倍其惠澤貫叙門次顯擢才能如此而已武帝納之
乃辟炳為主簿不起問其故答曰栖丘飲谷三十餘年
武帝善其對而止炳妙善琴書圖畫精於言理每游山
水往輒忘歸征西長史王敬弘每從之游未嘗不彌日
也乃下入廬山就釋慧遠考尋文義兄臧為南平太守

逼與俱還乃於江陵三湖立宅閑居無事武帝召為太尉行參軍驃騎將軍道憐命為記室參軍並不就二兄早卒孤累甚多家貧無以相贍頗營稼穡人有餉遺並受之武帝勅南郡長給吏役又數至餽賚後子弟從祿乃悉不復受武帝開府辟召下書召炳與鴈門周續之並為太尉掾皆不起及受禪徵為太子舍人元嘉初又以太子庶子徵並不應妻羅氏亦有高情與炳協趣羅氏沒炳哀之過甚既乃輟哭悲情頓釋謂沙門釋慧堅

曰死生之分未易可達三復至教方能遣哀衡陽王義季為荊州親至其室與之歡宴命為諮議參軍不起炳好山水愛遠游西陟荆巫南登衡岳因結宇衡山欲懷尚平之志有疾還江陵歎曰老疾俱至名山恐難徧覩唯當澄懷觀道卧以游之凡所游履皆圖之於室謂人曰撫琴動操欲令衆山皆響古有金石弄為諸桓所重桓氏亡其聲遂絕唯炳傳焉文帝遣樂師揚歡就炳受之炳孫測亦有祖風齊史隱逸有傳炳從父弟或之字

叔粲早孤事兄恭謹家貧好學雖文義不逮於炳而真
澹過之徵辟一無所就元嘉初大使陸子貞觀採風俗
三詣或之每辭疾不見告人曰我布衣草菜之人少長
壟畝何宜枉軒冕之客子真還表薦之又不就徵卒於
家

沈道虔吳興武康人也少仁愛好老易居縣北石山下
孫恩亂後飢荒縣令庾肅之迎出縣南廢頭里為立宅
臨溪有山水之玩時復還石山精廬與諸孤兄子共釜

庾之資困不改節受琴於戴逵王敬弘深敬重之郡州府凡十二命皆不就有人竊其園菜者外還見之仍自逃隱待竊者去後乃出人又拔其屋後大筍令人止之曰惜此筍欲令成林更有佳者相與乃令人買大筍送與之盜者慙不取道虔使置其門內而還常以捃拾自資同捃者或爭穠道虔諫之不止悉以其所得與之爭者愧慙後每事輒云勿令居士知冬月無複衣戴顒聞而迎之為作衣服并與錢一萬及還分身上衣及錢悉

供諸兄弟子無衣者鄉里少年相率受學道虔常無食
以立學徒武康令孔欣之厚相資給受業者咸得有成
文帝聞之遣使存問賜錢三萬米二百斛悉供孤兄子
嫁娶徵員外散騎侍郎不就累世事佛推父祖舊宅為
寺至四月八日每請像請像之日輒舉家感動焉道虔
年老菜食恒無經日之資而琴書為樂孜孜不倦文帝
勅郡縣使隨時資給卒子慧鋒脩父業不就州辟
孔淳之字彥深魯人也祖恢尚書祠部郎父粲祕書監

徵不就淳之少有高尚愛好墳籍為太原王恭所稱居
會稽剡縣性好山水每所游觀必窮其幽峻或旬日忘
歸嘗游山遇沙門釋法崇因留共止遂停三載法崇嘆
曰緬想人外三十年矣今乃傾蓋于茲不覺老之將至
也及淳之還乃不告以姓除著作佐郎太尉參軍並不
就居喪至孝廬于墓側服闋與處士戴顓王弘之及王
敬弘等並為人外之游又申之以婚姻敬弘以女適淳
之子尚遂以烏羊繫所乘車轅提壺為禮至則盡歡共

飲訖暮而歸或怪其如此答曰固亦農夫田婦之禮也
會稽太守謝方明苦要之不能致使謂曰苟不入吾郡
何為人吾郭淳之笑曰潛游者不識其水巢栖者非辨
其林飛沈所至何問其主終不肯往茅室蓬戶庭草蕪
徑唯牀上有數帙書元嘉初復徵為散騎侍郎乃逃于
上虞縣界家人莫知所在弟默之為廣州刺史出都與
別司徒王弘要淳之集冶城即日命駕東歸遂不顧也
元嘉七年卒默之儒學注穀梁春秋默之子熙先事在

范曄傳

周續之字道祖鴈門廣武人也其先過江居豫章建昌縣續之年八歲喪母哀戚過於成人奉兄如事父豫章太守范甯於郡立學招集生徒遠方至者甚衆續之年十二詣甯受業居學數年通五經五緯號曰十經名冠同門時稱為顏子既而閑居讀老易入廬山事沙門釋慧遠時彭城劉遺民遁迹廬山陶淵明亦不應徵命謂之潯陽三隱續之以為唯身不可遺餘累宜絕遂終身

不娶布衣蔬食劉毅鎮姑孰命為撫軍參軍徵為太守
博士並不就江州刺史每相招請續之不尚峻節頗從
之游常以嵇康高士傳得出處之美因為之注武帝北
討世子居守迎續之館于安樂寺延入講禮月餘復還
山江州刺史劉柳薦之武帝俄辟太尉掾不就帝北伐
還鎮彭城遣使迎之禮賜甚厚每稱之曰心無偏吝真
高士也尋復南還及帝踐阼復召之上為開館東郭外
招集生徒乘輿降幸并見諸生問續之禮記傲不可長

與我九齡射於矍圃之義辨析精奧稱為該通續之素
患風痺不復堪講乃移病鍾山景平元年卒通毛詩六
義及禮論注公羊傳行於世無子兄子景遠有續之之
風

戴顓字仲若譙郡銍人也父逵兄勃並隱遯有高名顓
年十六遭父憂幾於毀滅因此長抱羸患前後徵辟不
就以父不仕復修其業父善琴書顓並傳之凡諸音律
皆能揮手會稽剡縣多名山故世居剡下顓及兄勃並

受琴於父父歿所傳之聲不忍復奏遂各造新弄勃製五部顓製十五部顓又製長弄一部並傳於世中書令王綏嘗携客造之勃等方進豆粥綏曰聞卿善琴試欲一聽不答綏恨而去桐廬縣素多名山兄弟復共游之因留居止勃疾患醫藥不給顓謂勃曰顓今從兄閑居非有心於語默但以兄方疾苦無可營療顓當干祿以自濟耳乃求海虞令事垂行而勃卒乃止仍以桐廬僻遠難以養疾乃出居吳下吳下士人並為築室聚石引

水植林開澗少時繁密有若自然乃述莊周大旨著逍
遙論注禮記中庸篇三吳將守及郡内衣冠要其同游
野澤堪行便去不為矯介衆論以此多之宋國初建令
曰前太尉參軍戴顓辟士韋元並秉操幽遁守志不渝
宜加恩漿以宏止退並可散騎常侍通直不起元嘉初
又與宗炳同徵不就衡陽王義季鎮京口長史張邵與
顓姻通迎來止黃鵠山山北有竹林精舍林澗甚美顓
憇于此澗義季亟從之游顓服其野服不改常度為義

季鼓琴並新聲變曲其三調游絃廣陵止息之流皆與
世異文帝每欲見之嘗謂黃門侍郎張敷曰吾東巡之
日當宴戴公山下也以其好音長給正聲伎一部顓合
何嘗白鵠二聲以為一調號為清曠自漢世始有佛像
形制未工達特善其事顓亦參焉宋世子鑄丈六銅像
於瓦官寺既成而面恨瘦工不能改乃迎顓看之顓曰
非面瘦乃臂胛肥耳及減臂胛瘦患即除無不嘆服十
八年卒年六十四無子後景陽山成顓已亡矣上嘆曰

恨不使戴顓觀之

翟法賜潯陽柴桑人也曾祖湯祖莊父矯並高尚不仕
逃避徵辟法賜少守家業立屋於廬山頂喪親後便不
復還家不食五穀以獸皮及結草為衣雖鄉親中表莫
得見焉州辟主簿舉秀才徵著作佐郎並不就後其家
人至石室尋求因復遠徙違避徵聘遁迹幽深潯陽太
守鄧文子表曰奉詔書徵郡民新除著作佐郎南陽翟
法賜補散騎侍郎法賜隱迹廬山於今四世栖身幽巖

人罕見者如當逼以王憲東以嚴科驅山獵草以期禽
獲必致顛殞有傷盛化乃止後卒於巖石之間不知年
月

雷次宗字仲倫豫章南昌人也少入廬山事沙門釋慧
遠篤志好學尤明三禮毛詩隱退不交世務本州辟從
事散騎侍郎徵並不就與子姪書以言所守曰人生之
脩短咸有定分不可以智力求但當於所稟之中順而
勿牽爾汝等年各成長冠娶以畢脩葺衡泌吾復何憂

自今以往家事大小一勿見關子平之言可以為法元
嘉十五年召至京師開館於雞籠山聚徒教授置生百
餘人會稽諸膺之潁川庾蔚之並以儒學監總諸生時
國子學未立上留意藝文使丹陽尹何尚之立玄學太
子率更令何承天立史學司徒參軍謝元立文學凡四
學並建車駕數幸次宗館資給甚厚又除給事中不就
久之還廬山公卿以下並設祖道二十五年制以散騎
侍郎徵詣京邑為築室於鍾山西巖下謂之招隱館使

為皇太子諸王講喪服經次宗不入公門乃使自華林東門入延賢堂就業其年卒於鍾山子肅之頗傳其業官至豫章郡丞

郭希林武昌人也曾祖翻晉世高尚不仕希林少守家業徵召一無所就卒子蒙亦隱居不仕

劉凝之字隱安小名長生南郡枝江人也父期公衡陽太守兄盛公高尚不仕凝之慕老萊嚴子陵為人推家財與弟及兄子立屋於野外非其力不食州里重其德

行辟召並不就妻梁州刺史郭銓女也遣送豐麗凝之
悉散之親屬妻亦能不慕榮華與凝之安儉苦夫妻共
乘薄笨車出市貿易周用之外輒以施人為村里所誣
一年三輸公調凝之以為信然求皆與之又嘗有認其
所著履凝之笑曰僕著已敗令家中覓新者與君此人
後田中得所失履送還不肯復取徵為秘書郎不就臨
川王義慶衡陽王義季鎮江陵並遣使存問凝之答書
曰頓首稱僕不脩百姓禮人或譏焉凝之曰昔老萊向

楚王稱僕嚴陵亦抗禮光武未聞巢許稱臣堯舜時戴
顓與衡陽王義季書亦稱僕荊州年饑義季慮疑之餒
斃餉錢十萬疑之大喜將錢至市門觀有饑色者悉分
與之俄頃立盡性好山水一旦並携妻子泛江湖隱居
衡山之陽登高嶺絕人迹為小屋居之採藥服食妻子
皆從其隱元嘉二十五年卒年五十九

龔祈字蓋道武陵漢壽人也從祖元之父黎人並不應
徵辟祈風姿端雅容止可觀中書郎范述見而嘆之曰

此荆楚之仙人也自少及長徵辟一無所就祈時或賦詩而言不及世事卒年四十二

朱百年會稽山陰人也祖凱之晉左衛將軍父璿揚州主簿百年少有高情親亡服闋携妻孔氏入會稽山伐樵採箸為業以樵箸置道頭輒為行人所取明旦已復如此人稍怪之積久方知是朱隱士所賣須者隨其所堪多少留錢取樵箸而去或遇寒雪樵箸不售無以自資輒自榜船送妻還孔氏天晴復迎之有時出山陰為

妻買繒綵三五尺好飲酒遇醉或失之頗能言玄理為
詩詠往往有高勝之言隱迹避人唯與同縣孔顓友善
顓亦嗜酒相得輒酣對盡歡百年家素貧母以冬月亡
衣並無綿絮自此不衣綿帛嘗寒時就顓宿衣悉袂布
飲酒醉眠顓以卧具覆之百年不覺也既覺引卧具去
體謂顓曰綿定奇溫即因流涕悲慟顓亦為之傷感除
太子舍人不就顏竣為東揚州發教餉百年穀三百斛
不受時山陰又有寒人姚吟亦有高趣為衣冠所重竣

餉吟二百斛吟亦不受百年卒山中蔡興宗為會稽太守餉百年米百斛百年妻遣婢詣郡門固讓時人美之以比梁鴻妻

關康之字伯愉河東揚人也世居京口寓居南平昌少而篤學姿狀豐偉下邳趙繹以文義見稱康之與之友善特進顏延之等與當時名士十許人入山候之見其散髮被黃布帔席松葉枕一塊白石而卧了不相眄延之等咨嗟而退不敢干也晉陵顧悅之難王弼易義四

十餘條康之申王難顧遠有情理又為毛詩義經籍疑
滯多所論釋嘗就沙門支僧納學算妙盡其能徵辟一
無所就棄絕人事守志閑居弟雙之為臧質車騎參軍
與質俱下至赭圻病卒瘞於水濱康之時得疾少差牽
以迎喪因得虛勞病寢頓二十餘年時有閒日輒卧論
文義孝武即位遣大使陸子真巡行天下使反薦康之
宜加徵聘不見省康之性清約獨處一室希與妻子相
見不通賓客弟子以業傳授尤善左氏春秋齊高帝為

領軍時素好此學送本與康之康之手自點定又造禮
論十卷高帝絕賞愛之及崩遺詔以入元宮康之以明
帝泰始初與平原明僧紹俱徵辭以疾時又有河南辛
普明東陽樓惠明皆以篤行聞普明字文達少就康之
受業至性過人居貧與兄共處一帳兄亡仍以帳施靈
牀蚊甚多通夕不得寢而終不言侵蝨僑居會稽士子
高其行當葬兄皆送金為贈後至者不復肯受人問其
故答曰本以兄墓不周故不逆親友之意今實已足豈

可利亡者餘贈邪齊豫章王嶷為揚州徵為議曹從事
不就惠明字智遠立性貞固有道術居金華山舊多毒
蟲自惠明居之無復辛螫之苦藏名匿迹人莫之知明
帝召不至齊高帝徵又不至文惠太子在東宮苦延方
至乃又辭歸俄自金華輕棹西下乃就路迴之豐安旬
日之間唐寓之妖賊入城塗地唯豐安獨全時人以為
有先覺齊武帝勅為立館

漁父者不知姓名亦不知何許人也太康孫緬為尋陽

太守落日逍遙渚際見一輕舟陵波隱顯俄而漁父至
神韻蕭灑垂綸長嘯緬甚異之乃問有魚賣乎漁父笑
而答曰其釣非釣寧賣魚者邪緬益怪焉遂褰裳涉水
謂曰竊觀先生有道者也終朝鼓枻良亦勞止吾聞黃
金白璧重利也駟馬高蓋榮勢也今方王道文明守在
海外隱鱗之士靡然向風子何不贊緝熙之美何用晦
其若是也漁父曰僕山海狂人不達世務不辨貧賤無
論榮貴乃歌曰竹竿籊籊河水悠悠相忘為樂貪餌吞

鈞非夷非惠聊以忘憂於是悠然鼓楫而去緬字孝緒
太子僕興曾之子也有學義明帝甚知之位至左丞東
中郎司馬

齊

褚伯玉字元璩吳郡錢塘人也高祖舍始平太守父過
征虜參軍伯玉少有隱操寡嗜慾年十八父為之婚娶
婦入前門伯玉從後門出遂往剡居瀑布山性耐寒暑
時人比之王仲都在山三十餘年隔絕人物王僧達為

吳郡苦禮致之伯玉不得已停郡信宿纔交數言而退
宋孝建二年散騎常侍樂詢行採風俗表薦伯玉加徵
聘本州議曹從事不就高帝即位手詔吳會二郡以禮
迎遣又辭疾上不欲違其志勅於剡縣白石山立太平
館居之建元元年卒年八十六伯玉常居一樓上仍葬
樓所孔珪從其受道法為於館側立碑

顧歡字景怡一字元平吳郡鹽官人也家世寒賤父祖
並為農夫歡獨好學年六七歲知推六甲家貧父使田

中驅雀歡作黃雀賦而歸雀食稻過半父怒欲撻之見
賦乃止鄉中有學舍歡貧無以受業於舍壁後倚聽無
遺忘者夕則然松節讀書或然糠自照及長篤志不倦
聞吳興東遷邵元之能傳五經文句假為書師從之受
業同郡顧顗之臨縣見而異之遣諸子與游及孫憲之
並受經焉年二十餘更從豫章雷次宗諮元儒諸義母
亡水漿不入口六七日廬於墓次遂隱居不仕於剡中
天台山開館聚徒受業者常近百人歡早孤讀詩至哀

哀父母輒執書慟泣由是受業者廢蓼莪篇不復講焉

晚節服食不與人通每旦出戶山鳥集其掌上取食好
黃老通解陰陽書為數術多效驗初以元嘉中出都寄
住東府忽題柱云三十年二月二十一日因東歸後元
凶弒逆是其年月日也弟子鮑靈綬門前有一株樹大
十餘圍上有精魅數見影歡印樹樹即枯死山陰白石
村多邪病村人告訴求哀於歡歡乃往村中為講老子
規地作獄有傾見狐狸黿鼉自入獄中者甚多即命殺

之病者皆愈又有病邪者問歡歡曰家有何書答曰唯有孝經而已歡曰可取仲尼居置病人枕邊恭敬之自差也而後病者果愈人問其故答曰善讓惡正勝邪此病者所以差也高帝輔政徵為揚州主簿及踐阼乃至稱山谷臣顧歡上表進政綱一卷時員外郎劉思効表陳讜言優詔並稱其美歡東歸上賜塵尾素琴永明元年詔徵為太學博士同郡顧黯為散騎侍郎黯字長儒亦有隱操與歡俱不就徵會稽孔珪嘗登嶺尋歡共談

四本歡曰夫中理唯一豈容有二四本無正失中故也
於是著三名論以正之歡又以佛道二家教異學者互
相非毀乃著夷夏論以辨其異同宋司徒袁粲託為道
人通公駁之歡與往復論難其辭甚暢文多不載歡口
不辨長於著論又注王弼易二繫學者傳之知將終賦
詩言志曰五塗無恒宅三清有恒舍精氣因天行游魂
隨物化鵬鵬適大海蜩鳩之桑柘達生任去留善死均
日夜委命安所乘何方不可駕翹心企前覺融然從此

謝自尅死日自擇葬時卒於剡山時年六十四身體香軟道家謂之屍解仙化焉還葬舊墓木連理生於墓側縣令江山圖表狀武帝詔歡諸子撰歡文議三十卷又始興人廬度字孝章亦有道術少隨張永北侵魏永敗魏人追之急阻淮水不得過度心誓曰若得免死從今不復殺生須臾見兩楯流來接之得過後隱居廬陵西昌三顧山鳥獸隨之夜有鹿觸其壁度曰汝勿壞我壁鹿應聲而去屋前有池養魚皆名呼之次第來取食乃

去逆知其死年月與親友別永明末以壽終

杜京產字景齊吳郡錢塘人也祖運劉毅衛軍參軍父道鞠州從事善彈碁京產少恬靜閑意榮宦頗涉文義專脩黃老會稽孔顗清剛有峻節一見而為款交郡命主簿州辟從事稱疾去與同郡顧歡同契於始寧東山開舍授學建元中武陵王暉為會稽高帝遣儒士劉瓛入東為暉講瓛故往與之游曰杜生當今之臺尚也京產請瓛至山舍講書傾資供待子栖躬自屣履為瓛生

徒下食孔珪周顥謝瀹並致書以通殷勤永明十年珪
及光祿大夫陸澄祠部尚書虞悰太子右率沈約司徒
右長史張融表薦京產徵為奉朝請不至於會稽日門
山聚徒教授建武初徵為員外散騎侍郎京產曰莊生
持釣豈為白屋所回辭病不就卒會稽山陰人孔道徽
守志業不仕與京產善道徽父祐至行通神隱於四明
山嘗見山谷中有數百斛錢視之如瓦石不異采樵者
競取入手成沙礫曾有鹿中箭來投祐祐為之養創愈

然後去太守王僧虔與張緒書曰孔祐敬康曾孫也行
動幽祇德標松桂引為主簿遂不可屈此古之遺德也
道徽少厲高行能世其家風隱居南山終身不窺都邑
豫章王嶷為揚州辟西曹書佐不至鄉里宗慕之道徽
兄子總有操行遇飢寒不可得衣食縣令吳興丘仲孚
薦之除竟陵王侍郎竟不至永明中會稽鍾山有人姓
蔡不知名隱山中養鼠數千頭呼來即來遣去即去言
語狂易時謂之謫仙不知所終京產高祖子恭以來及

子栖世傳五斗米道不替栖有至性列在孝友傳

明僧紹字休烈一字承烈平原鬲人其先吳太伯之裔
百里夷子孟明其後世以名為姓祖玩州中從事父畧
給事中僧紹明經有儒術宋元嘉中再舉秀才永光中
鎮北府辟功曹並不就隱長廣郡嶗山聚徒立學魏尅
淮北乃南渡江宋明帝以通直郎召不就高帝為太傅
教辟僧紹及顧歡臧榮緒以旌幣之禮徵為記室參軍
不至僧紹弟慶符為青州僧紹乏糧食隨慶符之鬱州

住弇榆山栖雲精舍欣玩水石竟不一入州城詔書就
徵不就泰始季年岷益有山崩淮水竭齊郡僧紹竊謂
其弟曰夫天地之氣不失其序若夫陽伏而不泄陰迫
而不蒸於是乎有山崩川竭之變昔伊洛竭而夏亡河
竭而殷亡三川竭岐山崩而周亡五山崩而漢亡夫有
國必依山川而為固山崩川竭不亡何待今宋德如四
代之季矣爾誌吾言而勿泄也竟如其言建元元年冬
徵為正員外郎不就其後帝與崔思祖書曰明居士標

意可重吾前旨尚未達邪小涼欲有講事即可至彼具
述吾意令與慶符俱歸僧紹又曰不食周粟而食周薇
古猶發譏在今安得息談邪聊以為笑慶符罷任僧紹
隨歸住江乘攝山僧紹聞沙門釋僧遠夙德往候定林
寺帝欲出寺見之僧遠夙問僧紹曰天子若來居士若
為相對僧紹曰山藪之人政當鑿坯以遁若辭不獲命
當依戴公故事耳既而遁還攝山建栖霞寺而居之帝
甚以為恨昔戴顓高卧牖下以山人之服加其身與相

見僧紹故云高帝後謂慶符曰卿兄高尚其事亦堯之外臣朕夢想幽人固已動矣所謂逕路絕風雲通仍賜竹根如意筍籜冠隱者以為榮焉勃海封延伯者高行士也聞之嘆曰明居士身彌後而名彌先亦宋齊之儒仲也永明中徵國子博士不就卒僧紹長兄僧允能立言仕宋為江夏王義恭參軍王別為立榻比之徐孺子位冀州刺史子慧照元徽中為高帝平南主簿轉驃中兵參軍建元元年為巴州刺史綏懷長史上許為益州

刺史未遷卒僧允次弟僧暲亦好學宋大明中再使魏
于時新誅司空劉誕孝武謂曰彼若問廣陵之事何以
答之對曰當以周之管蔡漢之淮南語之帝大悅及至
魏魏問曰卿頻此句當疑上國無相踰者邪答曰聰明
特達舉袂成帷比屋之甿又無下僕晏子所謂看國善
惡故每辱此庭位至青州刺史僧紹子元琳仲璋山賓
並傳家業山賓最知名梁史有傳

臧榮緒東莞莒人也祖奉先建陵令父庸人國子助教

榮緒幼孤躬自灌園以供祭祀母喪後乃著嫡寢論洒
埽堂宇置筵席朔望輒拜薦甘珍未嘗先食純篤好學
括東西晉為一書紀錄志傳凡百一十卷隱居京口教
授高帝為揚州刺史徵榮緒為主簿不到建元中司徒
褚淵啓高帝稱述其美上答曰公所道臧榮緒者吾甚
悉之以其有史翰得入天祿甚嘉榮緒敦愛五經謂人
曰昔呂尚奉丹書武王致齋降位李釋教誡並有禮敬
之儀因甄明至道乃著拜五經序論嘗以宣尼庚子日

生其日陳五經拜之自號被褐先生又以飲酒亂德言
常為誠永明六年卒初榮緒與關康之俱隱京口世號
為二隱

宗測字敬微南陽人宋徵士炳之孫也世居江陵測少
靜退不樂人間常歎曰家貧親老不擇官而仕先哲以
為美談余竊有惑誠不能潛感地金冥致江鯉但當用
天之道分地之利孰能食人厚祿憂人重事乎驃騎豫
章王嶷辟為參軍不起測答府召云何為謬傷海鳥橫

斤山木母喪身負土植松栢豫章王復遣書請之辟為
參軍測答曰性同鱗羽愛止山壑眷戀松雲輕迷人路
縱宕巖流有若狂者忽不知老至而今鬢已白豈容課
虛責有限魚鳥慕哉永明三年詔徵為太子舍人不就
欲游名山乃寫祖炳所作尚子平圖於壁上測長子賓
官在京師知父此旨便求祿還為南郡丞測遂付以家
事刺史安陸王子敬長史劉寅以下皆贈送之測無所
受唯齋老莊二書自隨子孫拜辭悲泣測長嘯不視遂

往廬山止祖炳舊宅魚復侯子響為江州厚遣贈遺測
曰少有狂疾尋山採藥遠來至此量腹而進松朮度形
而衣薜蘿淡然已足豈容當此橫施子響命駕造之測
避不見後子響不告而來奄至所住測不得已巾褐對
之竟不交一言子響不悅而退侍中王秀之彌所欽慕
乃令陸探微畫其形與已相對又貽書曰昔人有圖畫
僞札輕以自方耳尚書令王儉亦雅重之贈以蒲褥笥
蓆頃之測送弟喪還西仍留舊宅永業寺絕賓客唯與

同志庾易劉虬宗人尚之等往來講說荊州刺史隨王
子隆至遣別駕宗忻口致勞問測笑曰貴賤理隔何以
及此竟不答建武二年徵為司徒主簿不就卒測善畫
自圖阮籍遇孫登於行鄣上坐卧對之又畫永業寺佛
影臺皆為妙作頗好音律善易老續皇甫謐高士傳三
卷又嘗游衡山七嶺著衡山廬山記云尚之字敬之亦
好山澤徵辟一無所就以壽終

吳苞字天蓋一字懷德濮陽鄆城人也儒學善三禮及

老莊宋太始中過江聚徒教學冠黃葛巾竹塵尾蔬食
二十餘年與劉瓛俱於褚淵宅講授瓛講禮苞講論語
孝經諸生朝聽瓛晚聽苞隆昌元年徵為太學博士不
就始安王遙光及江祐徐孝嗣共為立館於鍾山下教
授朝士多到門焉當時稱其儒者自劉瓛已後聚徒講
授唯苞一人而已以壽終時有趙僧巖蔡蒼皆有景行
慕苞為人僧巖北海人寥廓無常人不能測與劉善明
友善明為青州欲舉為秀才大驚拂衣而去後忽為沙

門栖遲山谷常以一壺自隨一旦謂弟子曰吾今夕當死壺中大錢一千以通九泉之路蠟燭一挺以照七尺之尸至夜而亡時人以為知命蔡蒼字休明陳留人清抗不與俗人交李撫謂江數曰古人稱安貧清白曰夷澹而不緇曰白至如蔡休明者可不謂之夷白乎又有魯國孔嗣之字敬伯宋時與高帝俱為中書舍人並非所好自廬江郡守去官隱居鍾山朝廷以為太中大夫卒

徐伯珍字文楚東陽太末人也祖父並郡掾史伯珍少孤貧學書無紙常以竹箭箬葉甘蔗及地上學書山水暴出漂溺宅舍村隣皆奔走伯珍累牀而坐讀書不輟叔父璠之與顏延之友善還袪蒙山立精舍講授伯珍往從學積十年尋究經史學者多依之太守琅邪王曇生吳郡張淹並加禮辟伯珍應召便退如此者凡十二焉徵士沈儼造膝談論申以素交吳郡顧歡擢出尚書滯義伯珍訓答甚有條理儒者宗之好釋氏老莊兼明

道術歲嘗早伯珍筮之如期而雨舉動有禮過曲木之下趨而避之早喪妻晚不復重娶自比曾參宅南九里有高山班固謂之九巖山後漢龍丘萇隱處也山多龍鬚檉栢望之五采世呼為婦人巖伯珍遂移居之階戶之間木生皆連理門前生梓樹一年便合抱館東石壁夜忽有赤光洞照俄爾而滅又有白雀一雙栖其戶牖論者以為隱德之感焉刺史豫章王辟議曹從事不就家甚貧窶兄弟四人皆白首相對時人呼為四皓建武

四年卒年八十四受業生凡千餘人伯珍同郡婁幼瑜
字季亦聚徒教授不應徵辟頗為臨川王暕所賞異著
禮据拾三十卷

沈麟士字雲禎吳興武康人也祖膺期晉太中大夫父
虔之宋安樂令麟士幼而俊敏年七歲聽叔父岳言玄
賓散言無所遺失岳撫其肩曰若斯文不絕其在爾乎
及長博通經史有高尚之心親亡居喪盡禮服闋忌日
輒涕泣彌日居貧織簾誦書口手不息鄉人號為織簾

先生嘗為人作竹誤傷手便流淚而還同作者謂曰此不足損何至涕零答曰此本不痛但遺體毀傷感而悲耳嘗行路隣人認其所著屐麟士曰是卿屐邪即跣而反隣人得屐送前者還之麟士曰非卿屐邪笑而受之宋元嘉末文帝令僕射何尚之抄撰五經訪舉學士縣以麟士應選不得已至都尚之深相接重謂子偃曰山藪故多奇士沈麟士黃叔度之流也豈可澄清清濁邪汝師之麟士嘗苦無書因游都下歷觀四部畢乃嘆曰

古人亦何人哉少時稱疾歸鄉不與人物通養孤兄子
義著鄉曲或勸之仕答曰魚縣獸檻天下一契聖人玄
悟所以每履吉先吾誠未能景行坐忘何為不希企日
損乃作玄散賦以絕世太守孔山士辟不應宗人徐州
刺史曇慶侍中懷文左率勃來候之麟士未嘗答也隱
居餘干吳差山講經教授從學士數十百人各營屋宇
依止其側時人為之語曰吳差山中有賢士開門教授
居城市麟士重陸機連珠每為諸生講之征北張永為

吳興請麟士入郡麟士聞郡後堂有好山水即戴安道
游吳興因古基為山池也欲一觀之乃往停數月永欲
請為功曹使人致意麟士曰明府德履冲素留心山谷
是以被褐負杖忘其疲病必欲飾渾沌以蛾眉冠越客
於文冕走雖不敏請附高節有蹈東海而死耳不忍受
此黥劓永乃止永明中吏部郎沈淵中書郎沈約並表
薦麟士義行曰吳興沈麟士英風夙挺峻節早成真粹
稟於天然博綜生乎篤習家世貧窶藜藿不給懷書而

耕白首無倦挾卷採薪行歌不輟長兄早卒孤姪數四
攝匭鞠稚吞苦推甘年踰七十業行無改元嘉以來聘
召仍疊玉質踰潔霜操日嚴若使聞政王庭服道槐掖
必能孚朝規於邊鄙布和澤於荒陲於是詔又徵為太
學博士不就麟士乃與約等書曰名者實之賓本所不
庶中央無心空勤南北為惠反凶將在於斯麟士無所
營求以篤學為務恒馮素几鼓素琴不為新聲負薪汲
水并日而食守操終老篤學不倦遭火燒書數千卷麟

士年過八十耳目猶聰手以反故抄寫燈下細書復成
二三千卷滿數十篋時人以為養身靜嘿所致製黑蝶
賦以寄意著周易兩繫莊子內篇訓注易經禮記春秋
尚書論語孝經喪服老子要畧數十卷梁天監元年與
何點同徵又不就二年卒於家年八十五以揚王孫皇
甫謚深達生死而終禮矯俗乃自為終制遺令氣絕別
被取三幅布以覆屍及斂仍移布於屍下以為斂服反
被左右兩際以周上不復製覆被不須沐浴含珠以本

袞衫先著禪凡二服上加單衣幅巾履枕棺中唯此依
士安用孝經既殯不復立靈座四節及祥權鋪席於地
以設玄酒之奠人家相承漆棺今不復爾亦不須旒成
服後即葬作冢令小後祔更作小冢於濱合葬非古也
冢不須聚土成墳使上與地平王祥終制亦爾葬不須
輜車靈舫魁頭也不得朝夕下食祭奠之法至于葬唯
取清水一孟子羹奉而行之州鄉皆稱歎焉

庾易字幼簡新野人也徙居江陵祖致巴郡太守父道

驥安西參軍易志性恬靜不交外物臨川王映臨州表
薦之餉麥百斛易謂使人曰走樵採麋鹿之伍得終身
毛褐馳騁日月之車保自耕之祿於大王之恩亦已深
矣固辭不受以文義自樂安西長史袁彖欽其風贈以
鹿角書格蚌盤蚌研白象牙筆并贈詩曰白日清明青
雲遼亮昔聞巢許今覩臺尚易以連理几竹翹書格報
之建武三年詔徵為司空主簿不就卒子黯妻於陵肩
吾皆知名各有傳

劉虬字靈預一字德明南陽涅陽人晉豫州刺史喬之
七世孫也徙居江陵虬少而抗節好學須得祿便隱宋
泰始中仕至晉平王驃騎記室當陽令罷官歸家靜處
常服鹿皮褙斷穀餌朮及胡麻建元初豫章王疑為荆
州牧辟虬為別駕與同郡宗測新野庾易並遺書禮請
之虬等各脩牋答而不應命永明三年刺史廬陵王子
卿表虬及同郡宗測宗尚之庾易劉昭五人請加蒲輪
束帛之命詔徵為通直郎不就竟陵王致書通意虬答

曰虬四節卧疾病三時營灌植暢餘陰於山澤託暮情
於魚鳥寧非唐虞重恩周邵宏施虬精信釋氏衣麤布
禮佛長齋注法華經自講佛義以江陵西沙洲去人遠
乃徙居之建武二年詔徵國子博士不就其冬虬病正
晝有白雲徘徊簷戶之內又有香氣及磬聲其日卒年
五十八虬子之遴知名梁史有傳

沈顗字處默吳興武康人也父坦之仕齊位都官郎顗
幼清靜有至行慕黃叔度徐孺子之為人讀書不為章

句著述不尚浮華常獨處一室人罕見其面從叔勃貴
顯每還吳興賓客填咽顗不至其門勃就之顗送迎不
越閭勃嘆曰吾乃今知貴不如賤也顗內行甚脩事母
兄孝友兄昂一名顯亦退素以家貧仕為始安令兄弟
不能相離相隨之任永明年中徵拜著作郎太子舍人
通直郎並不起文惠太子嘗擬古詩云磊磊落落玉山
崩顗聞之嘆曰此讖言也既而太子薨至秋武帝崩鬱
林海陵相次黜辱顗素不事家產及昂卒逢齊末兵荒

與家人并日而食或有饋其梁肉者閉門不受唯採蓴菜供食以樵採自資怡怡然恒不改其樂梁天監四年大舉北侵南陽樂藏為武康令以顓從役到建鄴揚州別駕陸任以書與吳興太守柳惔責之不能甄善別賢惔大慙即表停之卒於家所著文章數十篇

梁

何點字子皙廬江潯人也祖尚之宋司空父鑠宜都太守鑠素有風疾無故忽害點母王氏坐法死點兄弟以

此無宦情黥兄求字子有宋元嘉初為文帝挽郎歷位
太子洗馬丹陽郡丞清退無嗜慾後為太子中舍人泰
始初妻亡還吳葬舊墓除中書郎不拜仍住吳隱居波
若寺足不踰戶人莫見其面宋明帝崩出奔國哀除永
嘉太守求時寄住南澗寺不肯詣臺乞於野外拜受見
許一夜忽乘小船逃歸吳隱虎丘山齊永明四年拜太
中大夫不就卒黥年十一居父母憂幾至毀性及長感
家禍欲絕昏宦祖尚之彊為娶琅邪王氏禮畢將親迎

點累涕泣求執本志遂得罷點明目秀眉容貌方雅真
素通美不以門戶自矜博通羣書善談論家本素族親
姻多貴仕點雖不入城府性率到好狎人物遨遊人間
不簪不帶以人地並高無所與屈大言踦踞公卿敬下
之或乘柴車躡草屨恣心所適致醉而歸故世論以點
為孝隱士弟肩為小隱士士大夫多慕從之時人重其
通稱為游俠處士兄求卒點菜食不飲酒訖于三年腰
帶減半宋太始末徵為太子洗馬齊初累徵中書侍郎

太子中庶子並不就與陳郡謝瀹吳國張融會稽孔稚
珪為莫逆友點門世信佛從弟遁以東籬門園居之稚
珪為築室焉園內有卞忠貞冢點植花卉於冢側每飲
必舉酒酹之招携勝侶及名德桑門清言賦詠優游自
得初褚淵王儉為宰相點謂人曰我齊書作己竟贊云
淵既世族儉亦國華不賴舅氏遑恤國家王儉聞之欲
候點知不可見乃止豫章王嶷造點點從後門遁去司
徒竟陵王子良聞之曰豫章王尚望塵不及吾當望岫

息心後點在法輪寺子良就見之點角巾登席子良欣
說無已遺點嵇叔夜酒杯徐景山酒鎗點少時常患渴
利積年不愈後在吳中石佛寺建講於講所晝寢夢一
道人形貌非常授丸一掬夢中服之自此而差時人以
為淳德所感性通悅好施遠近致遺一無所拒隨後散
焉嘗行經朱雀門街有自車後盜點衣者見而不言旁
人禽盜與之點乃以衣施盜盜不敢受點令告有司盜
懼乃受之點雅有人倫之鑒多所甄拔知吳興丘遲於

童幼稱濟陽江淹於寒素其後貴達悉如其言點哀樂
過人常行逢葬者嘆曰此哭者之懷豈可思邪於是悲
慟不能禁老乃娶魯國孔嗣女嗣亦隱者點雖昏亦不
與妻相見築別室以處之人莫喻其意吳國張融少時
免官而為詩有高言點答詩曰昔聞東都日不在簡書
前雖戲而融久病之及點後昏融始為詩贈點曰惜哉
何處士薄暮遘荒淫點亦病之永元中崔慧景圍城人
間無薪點悉伐園樹以贍親黨慧景性好佛義先慕交

點點不顧之至是乃逼召點點裂裳為袴往赴其軍終
日談說不及軍事其語默之迹如此慧景平後東昏大
怒欲誅之王瑩為之懼求計於蕭暢暢謂茹法珍曰點
若不誘賊共講未必可量以此言之乃應得封東昏乃
止武帝與點有舊及踐阼手詔諭舊賜以鹿皮巾等仍
召之點以巾褐引入華林園帝賦詩置酒恩禮如舊仍
下詔以為侍中點捋帝鬚曰乃欲臣老子邪即辭疾不
起復下詔詳加資給並出在所日費所須太官別給天

監三年卒無子詔給第一品材一具喪事所須內監經理點弟肩字子季出繼叔父曠故更字肩叔年八歲居憂毀若成人及長輕薄不羈晚年折節好學師事沛國劉瓛受易及禮記毛詩又入鍾山定林寺聽內典其業皆通而縱情誕節時人未之知也惟瓛與汝南周顒深器異之仕齊為建安太守政有恩信不忍欺每伏臘放囚還家依期而反歷黃門侍郎太子中庶子尚書令王儉受詔撰新禮未就而卒又使特進張緒續成緒又卒

屬在司徒竟陵王子良子良以讓胥乃置學士二十人
佐胥撰錄後以國子祭酒與太子中庶子王瑩並為侍
中時胥單作祭酒疑所服陸澄博士該通亦不能據遂
以元服臨試爾後詳議乃用朱服祭酒朱服自此始也
及鬱林嗣位胥為后族甚見親待累遷中書令領臨海
巴陵王師允雖貴顯常懷止足建武初已築室郊外號
曰小山常與學徒游處其內至是遂賣園宅欲入東山
未及發聞謝朏罷吳興郡不還胥恐後之乃拜表解職

不待報輒去明帝大怒使御史中丞袁昂奏收屑尋有
詔許之屑以會稽山多靈異遂往游焉居若邪山雲門
寺初屑二兄求點並栖遁求先卒至是屑又隱世號點
為大山屑為小山亦曰東山世謂何氏三高永元中徵
為太常太子詹事並不就武帝霸府建引屑為軍謀祭
酒并與書屑不至及帝踐阼詔為特進右光祿大夫遣
領軍司馬王果之以手勅諭意並徵謝朏果之先至屑
所屑恐朏不出先示以可起乃單衣鹿皮巾執經卷下

牀跪受詔書出就席伏讀肩因謂果之曰吾昔於齊朝
欲陳兩三條事一者欲正郊丘二者欲更鑄九鼎三者
欲樹雙闕世傳晉室欲立闕王丞相指牛頭山云此天
闕也是則未明立闕之意闕者謂之象魏懸法於其上
決日而收之象者法也魏者當途而高大貌也鼎者神
器有國所先圓丘國郊舊典不同南郊祠五帝靈威仰
之類圓丘祠天皇帝北極大星是也往代合之郊丘
先儒之巨失今梁德告始不宜遂因前謬卿宜詣闕陳

之杲之曰僕之鄙劣豈敢輕議國典此當敬俟叔孫生
耳及杲之從謝胡所還問盾以出期盾知胡已應召答
杲之曰吾年已五十七月食四斗米不盡何容復有官
情杲之失色不能答盾反謂曰卿何不遣傳詔還朝拜
表留與我同游邪杲之愕然曰古今不聞此例盾曰檀
弓兩卷皆言物始自卿而始何必有例盾胡俱前代高
士而盾處名譽尤邁矣杲之還以盾意奏聞有勅給白
衣尚書祿盾固辭又勅山陰庫錢月給五萬又不受乃

勅何子朗孔壽等六人於東山受學太守衡陽王元簡
深加禮敬月中常命駕式閭談論終日屑以若邪山地
勢迫隘不容學徒乃遷秦望山山有飛泉乃起學舍即
林成援因巖為堵別為小閭室寢處其中躬自啓閉僮
僕無得至者山側營田二頃講隙從生徒游之屑初遷
將築室忽見二人著玄冠容貌甚偉問屑曰君欲居此
邪乃指一處云此中殊吉忽不復見屑依其言而卜焉
尋而山發洪水木石皆倒拔唯屑所居之室巋然獨存

元簡乃命鍾磔作瑞室頌刻於石以旌之及元簡去郡
入山與肩別肩送至都賜埭去郡三里因曰僕自棄人
事交游路絕非自降貴山藪豈容復望城邑此埭之游
於今絕矣執手涕零何氏過江自晉司空充並葬吳西
山肩家世年皆不永唯祖尚之至七十二肩年登祖壽
乃移還吳作別山詩一首言甚悽愴至吳居虎丘山西
寺講經論學僧復隨之東境守宰經途者莫不畢至肩
常禁殺忽有虞人逐鹿鹿徑來趨肩伏而不動又有異

烏如鷲紅色集講堂馴狎如家禽焉初開善寺藏法師
與肩遇於秦望山後還都卒於鍾山其死日肩在波若
寺見一名僧授肩香爐奩并函書云貧道發自揚都呈
何居士言訖失所在肩開函乃是大莊嚴論世中未有
訪之香爐乃藏公所常用又於寺內立明珠柱柱乃七
日七夜放光太守何遠以狀啓昭明太子太子欽其德
遣舍人何思澄致手令以褒美之中大通三年卒年八
十六先是肩疾妻江氏夢神告之曰汝夫壽盡既有至

德應獲延期汝當代之妻覺說焉俄得患而卒屑疾乃
瘳至是屑夢見一神女并八十許人並衣帔行列在前
俱拜牀下覺又見之便命營凶具既而疾困不復瘳遂
卒初屑侈於味食必方丈後稍欲去其甚者猶食白魚
鮓脯糖蟹以為非見生物疑食蚶蠣使門人議之學生
鍾岢曰鮓之就脯驟於屈申蟹之將糖躁擾彌甚仁人
用意深懷如怛至於車螯蚶蠣眉目內闕慙渾沌之奇
獷殼外緘非全人之慎不悴不榮曾草木之不若無馨

無臭與瓦礫其何算故宜長充庖厨永為口實竟陵王
子良見屹議大怒周顒與胥書勸令食菜曰變之大者
莫過死生生之所重無逾性命性命之於彼極切滋味
之在我可賒若云三世理誣則幸矣良快如使此道果
然而受形未息一往一來生死常事則傷心之慘行亦
自及丈人於血氣之類雖不身踐至於晨鳧夜鰥不能
不取備屠門財貝之經盜手猶為廉士所棄生性之物
一啓鸞刀寧復慈心所忍騶虞雖飢非自死之草不食

聞其風者豈不使人多媿丈人得此有素聊復片言起
發耳故屑末年遂絕血味屑注百法論十二門論各一
卷注周易十卷毛詩總集六卷毛詩隱義十卷禮記隱
義二十卷禮答問五十五卷子撰亦不仕有高風

阮孝緒字士宗陳留尉氏人也父彥之宋太尉從事中
郎以清幹流譽孝緒七歲出繼從伯允之允之母周氏
卒遺財百餘萬應歸孝緒孝緒一無所納盡以歸允之
姊琅邪王晏之母聞者咸歎異之乳人憐其傳重辛苦

竊玉羊金獸等物與之孝緒見而駭愕啟彥之送還王氏幼至孝雖與童兒遊戲恒以穿池築山為樂年十三遍通五經十五冠而見其父彥之彥之誡曰三加彌尊人倫之始宜思自勗以庇爾躬答曰願跡松子於瀛海追許由於穹谷庶保餘生以免塵累自是屏居一室非定省未嘗出戶家人莫見其面親友因呼為居士年十六父喪不服綿續雖蔬有味亦吐之外兄王晏貴顯屢至其門孝緒度之必至顛覆聞其茹管輅穿籬逃匿不

與相見曾食醬美問之云是王家所得使吐餐覆醬及
晏誅親戚咸為之懼孝緒曰親而不黨何坐之及竟獲
免武帝起兵圍建鄴家貧無以爨僮妾竊隣人墓樵以
繼火孝緒知之乃不食乃更令撤屋而炊所居以一鹿
牀為精舍以樹環繞天監初御史中丞任昉尋其元履
之所欲造面不敢望而歎曰其室雖邇其人甚遠其為
名流所欽尚如此自是欽慕風譽者莫不懷刺斂衽望
塵而息殷芸欲贈以詩昉曰趣舍既異何必相干芸乃

止唯與比部郎裴子野交子野薦之尚書徐勉言其年
十餘歲隨父為湘州行事不書官紙以成其親之清白
論其志行粗類管幼安比以采章如似皇甫謐天監十
二年詔公卿舉士祕書監傅照上疏薦之與吳郡范元
琰俱徵並不到陳郡袁峻謂曰往者天地閉賢人隱今
世路已清而子猶遁可乎答曰昔周德雖興夷齊不厭
薇蕨漢道方盛黃綺無悶山林為仁由已何關人世况
僕非往賢之類邪初謝朓及伏暉應徵天子以為隱者

苟立虛名以要顯譽故孝緒與何胤俱得遂其高志後
聽講於鐘山母王氏忽有疾兄弟欲召之母曰孝緒至
性冥通必當自到果心驚而反鄰里嗟異之合藥須得
生人葠舊傳鐘山所出孝緒躬歷幽險累日不逢忽見
一鹿前行孝緒感而隨後至一所遂滅就視果獲此草
母得服之遂愈時皆歡歎其孝感所致有善莖者張有
道曰吾見子隱迹而心難明自非考之龜蓍無以驗也
及布卦既揲五爻曰此將為咸應感之法非嘉遁之兆

孝緒曰安知後又不為上九果成遯卦有道歎曰此所

謂肥遯無不利象實應德心迹并也孝緒曰雖獲遯卦

而上九又不發升遐之道便當高謝許生乃著高隱傳

上自炎黃終於天監末斟酌分為三品言行超逸名氏

弗傳為上篇始終不耗姓名可錄為中篇挂冠人世棲

心塵表為下篇湘東王著忠臣傳集釋氏碑銘丹陽尹

錄研神記並先簡孝緒而後施行南平元襄王聞其名

致書要之不赴曰非志驕富貴但性畏廟堂若使麀麀

可駢何以異夫驥駟初建武末清溪宮東門無故自崩
大風拔東宮門外楊樹或以問孝緒孝緒曰青溪皇家
舊宅齊為木行東為木位今東門自壞木其衰矣武帝
素畜識緯孝緒兼有其書或勸藏之答曰昔劉德重淮
南祕要適為更生之禍杜瓊所謂不如不知此言美矣
客有求之答曰已所不欲豈可嫁禍於人乃焚之鄱陽
忠烈王妃孝緒姊也王嘗命駕欲就之游孝緒鑿垣而
遁卒不肯見王悵然歎息王諸子篤渭陽之情歲時之

貢無所受納未嘗相見竟不知識或問其故孝緒曰我
本素賤不應為王侯姻戚邂逅所逢豈關始願劉歆曾
以米饋之孝緒不納歆亦棄之末年以蔬食斷酒其恒
供養石像先有損壞心欲治補罄心敬禮經一夜忽然
完復衆並異之大同二年正月孝緒自筮卦吾壽與劉
著作同年及劉杳死孝緒曰劉既逝矣吾其幾何其年
十月卒年五十八簡文在東宮隆恩厚贈子恕等述先
志不受顧協以為恩異常均議令恭受門徒追論德行

謚曰文貞處士所著七錄削繁等一百八十一卷並行
於世初孝緒所撰高隱傳中篇所載一百三十七人劉
歆劉訐覽其書曰昔嵇康所贊闕一自擬今四十之數
將待吾等成之邪對曰所謂荀君雖少後事當付鍾君
若素車白馬之日輒獲麟於二子歆訐果卒乃益二傳
及孝緒亡訐兄絜錄其所遺行次於篇末成絕筆之意
云

劉歆字士光平原人也本名冉祖勔宋司空父繪武帝

霸府從事中郎繪附兄太常俊傳列在齊史歆始生之
夕有香氣滿室幼有識慧四歲喪父與羣兒同處獨不
戲弄六歲誦論語毛詩意所不解便能問難十二讀莊
子逍遙篇曰此可解耳客問之隨問而答皆有情理家
人每異之謂為神童及長博學有文才不娶不仕與族
弟訐並隱居求志遨遊林澤以山水書籍相娛而已奉
母兄以孝悌稱寢食不離左右母意有所須口未及言
歆已先知手自營辦狼狽供奉母每疾篤夢歆進藥及

翌日轉有間効其誠感如此性重興樂尤愛山水登危履險必盡幽遐人莫能及皆歎其有濟勝之具常欲避人世以母老不忍違每隨兄霽香從官少時好施務周人之急人或遺之亦不拒也久而歎曰受人者必報不則有愧於人吾固無以報人豈可常有愧乎天監十七年忽著革終論以為形者無知之質神者有知之性有知不獨存依無知以自立故形之於神逆旅之館耳及其死也神去此館速朽得理是以子羽沈川漢伯方壙

文楚黃壤士安麻索此四子者得理也若從四子而遊
則平生之志得矣然積習生常難卒改革一朝肆志儻
不見從今欲翦截煩厚務在儉易進不保尸退畢常俗
不傷存者之念有合至人之道且張與止用幅巾王肅
唯盥手足范冉斂畢復葬爰珍無設筵几文度故舟為
棺子庶牛車載柩叔超誠絕墳壠康成使無卜吉此數
公者尚或如之况為吳人而尚華泰今欲髣髴景行以
為軌則氣絕不須復魂盥洗而斂以一千錢市成棺單

故裙衫衣巾枕履此外送往之具棺中常物一不得有
所施世多信李彭之言可謂惑矣余以孔釋為師差無
此惑斂訖載以露車歸於舊山隨得一地地足為坎坎
足容棺不須塋甃不勞封樹勿設祭饗勿置几筵其蒸
嘗繼嗣言象所絕事止余身無傷世教初訏之疾歆盡
心救療及卒哀傷為之詠又著悲友賦以序哀情忽有
老人無因而至謂曰君心力堅猛必破死生但運會所
至不得久留一方耳彈指而去歆心知其異試遣尋之

莫知其所於是信心彌篤既而寢疾恐貽母憂乃自言
笑勉進湯藥謂兄霽杳曰兩兄祿仕足申供養歆之歸
泉復何所憾願深割無益之悲十八年年三十二卒始
沙門釋寶誌遇歆於興皇寺驚起曰隱居學道清淨登
仙如此三說歆未死之春有人為其庭中栽柿歆謂兄
子弇曰吾不見此實爾其勿言至秋而亡人以為知命
親故誄其行迹謚曰貞節處士先是有太中大夫琅邪
王敬允以天監八年卒遺命不得設復魄旌旒一蘆蓆

藉下一枚覆上吾氣絕便沐浴藍輿載尸還忠侯大夫
隧中若不行此則戮吾尸於九泉敬允外甥許慧昭因
阮研以聞詔曰敬允令其息崇素氣絕便沐浴藉以二
蘆簾鑿地周身歸葬忠侯此達生之格言賢夫玉匣石
槨遠矣然子於父命亦有所從有所不從今崇素若信
遺意土周淺薄屬辟不施一朝見侵狐鼠戮尸已甚父
可以訓子子亦不可行之外內易棺此自奉親之情藉
土而葬亦通人之意宜兩捨兩取以達父子之志棺周

於身土周於櫛去其牲奠斂以時服一可以申情二可以稱家禮教無違生死無辱此故當為安也歆族弟訐字彥度祖承宗宋太宰參軍父靈真齊鎮西諮議武昌太守訐幼稱純孝數歲父母繼卒訐居喪哭泣孺慕幾至滅性赴弔者莫不傷焉後為伯父所養事伯母及昆妹孝友篤至為宗族所稱自傷早孤人有誤觸其諱者未嘗不感結流涕長兄絜為聘妻尅日成婚訐聞而逃匿事息乃還本州刺史張稷辟為主簿主者檄召訐乃

掛檄於樹而逃陳留阮孝緒博學隱居不交當世恒居
一鹿牀環植竹木寢處其中時人造之未嘗見也訐經
一造孝緒即顧以神交訐族兄歆又履高操三人日夕
招携故都下謂之三隱訐善立言尤精意釋典曾與歆
聽講鐘山諸寺因共卜築宋熙寺東澗有終焉之志尚
書郎何炯嘗遇之於路曰此人風神穎俊蓋荀奉倩衛
叔寶之流也命駕造門拒而不見族祖孝標與書稱之
曰訐超超越俗如半天朱霞歆矯矯出塵如雲中白鶴

皆儉歲之梁稷寒年之織績訐常著穀皮巾披衲衣每遊山澤輒留連忘返神理閑正姿貌甚華在林谷之間意氣彌遠或有遇之者皆謂神人家甚貧苦併日而食隆冬之月或無氈絮訐處之晏然人不覺其飢寒也自少至長無喜愠之色每於可競之地輒以不競勝之或有加陵之者莫不退而愧服由是衆論咸歸重焉天監七年卒於歆舍臨終執歆手曰氣絕便斂斂畢即埋靈篋一不須立勿設饗祀無求繼嗣歆從而行之宗人至

友相與刊石立銘謚曰元貞處士

南嶽鄧先生名郁荊州建平人也少而不仕隱居衡山
極峻之嶺立小版屋兩間足不下山斷穀三十餘載唯
以澗水服雲母屑日夜誦大洞經武帝敬信殊篤為帝
合丹帝不敢服起五嶽樓貯之供養道家吉日躬往禮
拜白日神仙魏夫人忽來臨降乘雲而至從少媼三十
並著絳紫羅繡袿襦年皆可十七八許色艷桃李質勝
瓊瑤言語良久謂郁曰君有仙分所以故來尋當相候

至天監十四年忽見二青鳥悉如白鶴大鼓翼鳴舞移
晷方去謂弟子等曰求之甚勞得之甚逸近青鳥既來
期會至矣少日無病而終山內唯聞香氣世未嘗有武
帝後令周捨為鄧元傳具序其事

陶弘景字通明丹陽秣陵人也祖隆王府參軍父貞孝
昌令初弘景母郝氏夢青龍自懷而出并見兩天人手
執香爐來至其所已而有娠遂以宋孝建三年丙申歲
夏至日生弘景幼有異操年四五歲恒以荻為筆畫灰

中學書至十歲得葛洪神仙傳晝夜研尋便有養生之志謂人曰仰青雲覩白日不覺為遠矣父為妾所害弘景終身不娶及長身長七尺七寸神儀明秀朗目疎眉細形長額聳耳耳孔有十餘毛出外二寸許左膝有數十黑子作七星文讀書萬餘卷一事不知以為深耻善琴碁工草隸未弱冠齊高帝作相引為諸王侍讀除奉朝請雖在朱門閉影不交外物惟以披閱為務朝儀故事多所取焉家貧求宰縣不遂永明十年脫朝衣掛神

虎門上表辭祿詔許之賜以束帛敕所在日給伏苓五斤白蜜二升以供服餌及發公卿祖之於征虜亭供張甚盛車馬填咽皆云宋齊以來未有斯事朝野榮之於是止於句容之句曲山恒曰此山下是第八洞宮名曰金陵華陽之天周回一百五十里昔漢有咸陽三茅君得道來掌此山故謂之茅山乃中山立館自號華陽陶隱居人間書禮即以隱居代名始從東陽孫游嶽受符圖經法徧歷名山尋訪仙藥身既輕捷性好山水每經

澗谷必坐卧其間吟詠盤旋不能已已謂門人曰吾見
朱門廣廈雖識其華樂而無欲往之心望高巖瞰大澤
知此難立止自恒欲就之且永明中求祿得輒差舛若
不爾豈得為今日之事乎豈唯身有仙相亦緣勢使之
然也時沈約為東陽郡守高其志操累書要之不至弘
景為人圓通謙謹出處冥會心如明鏡遇物便了言無
煩舛有亦隨覺齊宜都王鑑為明帝所害其夜夢鑑告
弘景別云三年當生某家弘景因訪其幽冥中事多說

祕異因著夢記焉永元初更築三層樓自處其上弟子處其中賓客至其下與物遂絕唯一家僮得至其所本便馬善射晚皆不為唯聽吹笙而已特愛松風庭院皆植松每聞其響欣然為樂有時獨游泉石望見者以為仙人性好著述尚奇異顧惜光景老而彌篤尤明陰陽五行風角星算山川地理方圓產物醫術本草帝代年歷以算推知漢熹平三年丁丑冬至加時在日中而天實以乙亥冬至加時在夜半凡差三十八刻是漢歷後

天二日十二刻也又以歷代皆取其先妣母后配饗地祇以為神理宜然碩學通儒咸所不悟又嘗造渾天象高三尺許地居中央天轉而地不動以機動之悉與天相會云修道所須非止史官用是深慕張良為人云古賢無與為此齊末為歌曰水丑木為梁字及武帝兵至新林遣弟子戴猛之假道奉表及聞議禪代弘景乃援引圖讖數處皆成梁字令弟子進之武帝既早與之游及即位後恩禮愈篤書問不絕冠蓋相望弘景既得神

符祕訣以為仙丹可成而苦無藥物帝給黃金朱砂曾
青雄黃等後合飛丹色如霜雪服之體輕及帝服飛丹
有驗益敬重之每得其書燒香虔受帝使造年歷至已
己歲而加朱點實太清三年也帝手敕數招之錫以鹿
皮巾後屢加禮聘並不出惟畫作兩牛一牛散放在水
草之間一牛著金籠頭有人執繩以杖驅之帝笑曰此
人無所不作欲斃曳尾之龜豈有可致之理國家每有
吉凶征討大事無不前以諮訪月中常有數信時人謂

為山中宰相二宮及王公貴要參候相繼贈遺未嘗絕
時多不納受縱留者即作功德天監四年移居積金東
澗弘景得辟穀導引之法自隱處四十許年逾八十而
有壯容仙書云眼方者壽千歲弘景末年一眼有時而
方曾夢佛授其菩提記云名為勝力菩薩乃詣鄮縣阿
育王塔自誓受五大戒後簡文臨南徐州欽其風素召
至後堂以葛巾進見與談論數日而去簡文甚敬異之
天監二年獻丹於武帝中大通初又獻二丹其一名善

勝一名成勝並為佳寶弘景無疾自知應逝逆尅亡日
仍為告逝詩大同二年卒時年八十五顏色不變屈伸
如常香氣累日氤氲滿山遺令既沒不須沐浴不須施
牀止以兩重席鋪於地因所著舊衣上加生緘裙及臂
衣靺冠巾法服左肘錄鈴右肘藥鈴佩符絡左腋下繞
腰穿環結於前釵符於髻上通以大袈裟覆衾蒙首足
器有車馬道人道士並在門中道人左道士右百日内
常然燈旦常香火弟子遵而行之詔贈太中大夫謚曰

貞白先生弘景妙解術數逆知梁祚將覆預製詩云夷
甫任散誕平叔坐論空豈悟昭陽殿遂作單于宮詩藏
篋中化後門人方稍出之大同末士人競談玄理不習
武事及侯景篡果在昭陽殿初弘景母夢青龍無尾自
己升天弘景果不娶無子從兄以子松喬嗣所著學苑
百卷孝經論語集注帝代年厯本草集注効驗方肘後
百一方古今州郡記圖像集要及玉匱記七曜新舊術
數疏占候合丹法式共秘密不傳及撰而未訖又十部

唯弟子得之

諸葛璩字幼玖琅邪陽都人也世居京口璩幼事徵士
關康之博涉經史復師徵士臧榮緒榮緒著晉書稱璩
有發擿之功方之壺遂齊建武初南徐州行事江祀薦
璩於明帝言璩安貧守道悅禮敦詩如其簡退可揚清
厲俗請辟為議曹從事帝許之璩辭不赴陳郡謝朓為
東海太守下教揚其風槩餉穀百斛天監中舉秀才不
就璩性勤於誨誘後生就學者日至居宅狹陋無以容

之太守張仄為起講舍璩處身清正妻子不見喜愠之色旦夕孜孜講誦不輟時人益以此崇之卒於家璩所著文章二十卷門人劉暉集而錄之

劉慧斐字宣文彭城人也父元直淮南太守慧斐少博學能屬文起家安成王法曹行參軍嘗赴都途經尋陽游於匡山遇處士張孝秀相得甚歡遂有終焉之志因不仕居於東林寺又於山北構園一所號曰離垢園時人仍謂離垢先生慧斐尤明釋典工篆隸在山寫佛經

二千餘卷常所誦者百餘卷晝夜行道孜孜不怠遠近
欽慕之簡文臨江州遺以几杖論者云自遠法師歿後
將二百年始有張劉之盛矣元帝及武陵王等書問不
絕大同三年卒慧斐兄慧鏡子曇淨有孝行列在孝友
傳

范元琰字伯珪一字長玉吳郡錢唐人也祖悅之太學
博士徵不至父靈瑜居父憂以毀卒元琰時童孺哀慕
盡禮親黨異之及長好學博通經史兼精佛義性謙敬

不以所長驕人祖母患靡恒自含吮與人言常恐傷物
居家不出城市雖獨居如對賓客見者莫不改容憚之
家貧唯以園蔬為業嘗出行見人盜其耘元琰遽退走
母問其故具以實答母問盜者為誰答曰向所以退畏
其愧耻今啓其名願不泄也於是母子祕之或有涉溝
盜其筍者元琰因伐木為橋以度之自是盜者大慙一
鄉無復草竊齊建武初徵為曹虎平西參軍不至于時
始安王遙光為揚州謂徐孝嗣曰曹虎參軍豈是禮賢

之職欲以西曹書佐聘之會遙光敗不果時人以為恨
沛國劉瓛深加器異嘗表稱之天監九年縣令管慧辯
上言義行揚州刺史臨川王宏辟命不至卒於家

庾詵字彥寶新野人也幼聰警篤學經史百家無不該
綜緯候書射碁算機巧並一時之絕而性託夷簡特愛
林泉十畝之宅山池居半蔬食弊衣不治產業遇火止
出書數篋坐於池上有為火來者答云唯恐損竹嘗乘
舟從沮中山舍還載米一百五十石有人寄載三十石

及至宅寄載者曰君三十斛我百五十斛詵默然不言
恣其取足隣人有被執為盜見劾妄款詵詵矜之乃以
書質錢二萬令門生詐為其親代之酬備隣人獲免謝
詵詵曰吾矜天下無辜豈期謝也武帝少與詵善及起
兵署為平西府記室詵不屈平生少所游狎河東柳惲
欲與交拒而弗納普通中詔以為黃門侍郎稱疾不赴
晚年尤遵釋教宅內立道場環繞禮懺六時不輟誦法
華經每日一徧後夜中忽見道人自稱願公容止甚異

呼詵為上行先生授香而去中大通四年因晝寢忽驚
覺曰願公復來不可久住顏色不變言終而卒年七十
八舉室咸聞空中唱云上行先生已生彌陀淨域矣武
帝聞而下詔謚曰貞節處士詵所撰帝歷二十卷易林
二十卷續伍端休江陵記一卷晉朝雜事五卷總抄八
十卷行於世子曼倩字世華亦早有令譽元帝在荊州
以為中錄事每出帝嘗目送之謂劉之遴曰荆南信多
君子後轉諮議參軍所著喪服儀文字體例老子義疏

算經及七曜歷術并所製文章凡九十五卷子季才有學行承聖中位中書侍郎江陵平隨例入長安

張孝秀字文逸南陽宛人也徙居尋陽曾祖須無祖僧監父希並別駕從事孝秀長六尺餘白皙美鬚眉仕州從事史遇刺史陳伯之叛孝秀與州中士大夫謀襲之事覺逃於盆水側有商人寘諸褚中展轉入東林伯之得其母郭以蠟灌殺之孝秀遂遣其妻妾入匡山修行學道服闋建安王召為別駕因去職歸山居於東林寺

有田數十頃部曲數百人率以力田盡供山衆遠近歸慕赴之如市孝秀性通率不好浮華常冠縠皮巾躡蒲履手執并閭皮麈尾服寒食散盛冬卧於石上博涉羣書專精釋典僧有虧戒律者集衆佛前作偈磨而笞之多能改過善談論工隸書凡諸藝能莫不明習普通三年卒室中皆聞非常香簡文甚傷悼焉與劉慧斐書述其貞白云

庾承先字子通潁川鄆陵人也少沈靜有志操是非不

涉於言喜愠不形於色人莫能窺也弱歲受學於南陽
劉虬強記敏識出於羣輩玄經釋典靡不該悉九流七
略咸所精練辟功曹不就乃與道士王僧鎮同游衡岳
晚以弟疾還鄉里遂居士臺山鄱陽忠烈王在州欽其
風味要與游處令講老子遠近名僧咸來赴集論難鋒
起異端競至承先徐相酬答皆得所未聞忠烈王尤所
欽重中大通三年廬山劉慧斐至荊州承先與之有舊
往從之荊峽學徒因請承先講老子湘東王親命駕臨

聽論議終日留連月餘乃還山王親祖道并贈篇什隱者美之其年卒刺史厚有贈賻門人黃士龍讓曰先師平素食不求飽衣不求輕凡有贈遺皆無所受臨終之日誠約家門薄棺周形巾褐為斂雖蒙賚及不敢輕承教旨以違平生之操錢布輒付使反時論高之

陳

馬樞字要理扶風郿人也祖靈慶齊竟陵王錄事參軍樞數歲而孤為其姑所養六歲能誦孝經論語老子及

長博極經史尤善佛經及周易老子義梁邵陵王綸為
南徐州刺史素聞其名引為學士綸時自講大品經令
樞講維摩老子周易同日發題道俗聽者二千人王欲
極觀優劣乃謂衆曰與馬學士論義必使屈服不得空
立客主於是數家學者各起問端樞乃依次剖判開其
宗旨然枝分派別轉變無窮論者拱默聽受而已綸甚
嘉之尋遇侯景之亂綸舉兵援臺乃留書二萬卷付樞
樞肆志尋覽殆將周遍乃喟然歎曰吾聞貴爵位者以

巢由為桎梏愛山林者以伊呂為管庫東名實則芻狗
柱下之言翫清虛則糠粃席上之說稽之篤論亦各從
其好也此求志之士望塗而息豈天之不惠高尚何山
林之無聞甚乎乃隱於茅山有終焉之志天嘉元年文
帝徵為度支尚書辭不應命時樞親故並居京口每秋
冬之際時往游焉及鄱陽王為南徐州刺史欽其高尚
鄙不能致乃卑辭厚意令使邀之樞固辭以疾門人勸
請不已乃行王別築室以處之樞惡其崇麗乃於竹林

間自營茅茨而居每以王公餽餉辭不獲已者率十分受一樞少屬亂離凡所居處盜賊不入依託者常數百家自精洞黃能視閭中物有白鷄一雙巢其庭樹馴狎櫬廡時至几案春來秋去幾三十年大建十三年卒撰道覺論行於世

後魏

眭夸一名旭趙郡高邑人也祖邁晉東海王越軍謀掾後沒石勒為徐州刺史父邃字懷道慕容寶中書令夸

少有大度不拘小節耽好書傳未嘗以世務經心好飲酒浩然物表年三十遭父喪鬚鬢致白每一悲哭問者為之流涕高尚不仕寄情丘壑同郡李順願與之交夸拒而不許邦國少長莫不憚之少與崔浩為莫逆之交浩為司徒奏徵夸為中郎稱疾不赴州郡逼遣不得已乃入京師與浩相見延留數日唯飲酒談叙平生不及世利浩每欲論屈之竟不能發言其見敬憚如此浩後遂投詔書於夸懷亦不開口夸曰桃簡卿已為司徒何

足以此勞國士也吾便於此將別桃簡浩小名也浩慮
夸即還夸時乘一騾更無兼騎乃以夸騾內之厩中冀
相縻繫夸遂託鄉人輸租者謬為御車乃得出關浩知
而歎曰嗟夸獨行士本不應以小職辱之又使其人杖
策復路吾當何辭以謝之也時朝法甚峻夸既私還將
有私歸之咎浩仍相左右始得無坐經年送夸本騾兼
以所乘馬為書謝之夸更不受其馬亦不復書及浩誅
沒為之素服受鄉人弔唁經一時乃止歎曰崔公已死

誰能更容睦夸乎婦父鉅鹿魏攀當時名達之士未嘗
備翁壻之禮情同朋好或人謂夸曰吾聞有大才者必
居貴位子何獨在桑榆乎遂著知命論以釋之夸又作
朋友論篇辭義為時人所稱年七十五卒葬日赴者如
市無子

馮亮字靈通南陽人梁平北將軍蔡道恭之甥也少博
覽諸書又篤好佛理隨道恭至義陽會中山王英平義
陽獲焉英素聞其名以禮待接亮性清淨後隱居嵩山

感英之德以時展覲及英亡亮奔赴盡其哀慟宣武嘗
召以為羽林監領中書舍人將令侍講十地諸經固辭
不許又欲使衣幘入見苦求以幅巾就朝遂不彊逼還
山數年與僧徒禮誦為業蔬食飲水有終焉之志會逆
人王敬事發連山中沙門既而亮被執赴尚書省十餘
日詔特免雪亮不敢還山遂遇居景明寺敕給衣食及
其從者數人後甚思舊居復還山室亮既雅愛山水又
兼工思結築巖林甚得棲遊之適宣武聞之給其工力

令與沙門統僧暹河南尹甄琛等同視嵩高形勝之處
遂造閑居佛寺林泉既竒營製又美曲盡山居之妙亮
時出京師延昌二年冬因遇篤疾宣武敕以馬輿送令
還山居嵩高道場寺數日而卒詔贈帛二百匹以供凶
事遺誠兄子綜殮以衣幘左手持版右手執孝經一卷
置尸盤石上去人居數里外積十餘日乃焚於山上以
灰燼處起佛塔經藏初亮以盛冬喪時連日驟雪窮山
荒澗鳥獸飢窘僵尸山野無所防護時有壽春道人惠

需每旦往看其屍拂去塵霰禽蟲之迹交橫左右而初
無侵毀衣服如本著唯風吹帽巾少側又以亮識舊南
方法師遣信大栗十枚言期之將來十地果報開亮手
以置把中經宿乃為蟲鳥盜食皮殼在地而亦不傷肌
體焚燎之日有素霧蒼鬱回繞其傍自地屬天彌朝不
絕山中道俗營助者百餘人莫不異焉

李謐字永和潯郡人也祖祥河間太守父安世相州刺
史皆有傳謐少而好學博通諸經周覽百氏初師事小

學博士孔璠數年之後璠還就謚請業同門生為之語
曰青成藍藍謝青師何常在明經謚以公子徵拜著作
佐郎辭以授弟郁詔許之州再舉秀才公府二辟並不
就唯以琴書為業有絕世之心覽考工記大戴禮盛德
篇以明堂之制不同遂著明堂之度論曰余謂論事辨
物當取正於經典之真文援證定疑必有驗於周孔之
遺訓然後可以稱準的矣今禮文殘缺聖言靡存明堂
之制靡使正之是以後人紛糾競興異論五九之說各

信其習是非無準得失相半故歷代紛紜靡所取正乃
使裴顧云今羣儒紛糾互相倚據就令其象可得而圖
其所以居用之禮莫能通也為設虛器耳況漢氏所作
四維之个復不能令各處其辰愚以為尊祖配天其義
明著廟宇之制理據未分直可為殿屋以崇嚴父之祀
其餘雜碎一皆除之斯豈不以羣儒并立並垂其實據
義求衷莫適可從哉但恨典文殘滅求之靡據而已矣
乃復遂去室牖諸制施之於教未知其所隆政求之於

情未可喻其所以必須惜哉言乎仲尼有言曰賜也爾
愛其羊我愛其禮余以為隆政必須其禮豈彼一羊哉
推此而論則聖人之於禮殷勤而重之裴顧之於禮任
意而忽之是則顧賢於仲尼矣以斯觀之裴氏子以不
達夫禮之旨也余竊不自量頗有鄙意據理尋義以求
其真貴合雅衷不苟偏信乃藉之以禮傳考之以訓注
博採先賢之言廣搜通儒之說量其當否參其同異棄
其所短收其所長推義察圖以折厥衷豈敢必善聊亦

合其言志矣凡論明堂之制者雖衆然校其大略則二途而已言五室者則據周禮考工之記以為本是康成之徒所執言九室者則案大戴盛德之篇以為源是伯喈之倫所持此二書雖非聖言然是先賢之中博見洽通者也但各記所聞未能全正可謂既盡美矣未盡善也而先儒不能考其當否便各是所習卒相非毀豈達士之確論哉小戴氏傳禮事四十九篇號曰禮記雖未能全當然多得其衷方之前賢亦無愧矣而月令玉藻

明堂三篇頗有明堂之義余故採掇二家參之月令以
為明堂五室古今通則其室居中者謂之太室太室之
東者謂之青陽當太室之南者謂之明堂太室之西者
謂之總章當太室之北者謂之玄堂四面之室各有夾
房謂之左右个三十六戶七十二牖矣室个之形今之
殿前是其遺像耳个者即寢之房也但明堂與寢施用
既殊故房个之名亦隨事而遷耳今粗書其像以見鄙
意案圖察義略可驗矣故檢之五室則義明於考工校

之戶牖則數協於盛德考之施用則事著於月令求之
閏也合周禮與玉藻既同夏殷又符周秦雖乖衆儒儻
或在斯矣考工記曰周人明堂度以九尺之筵東西九
筵南北七筵堂崇一筵五室凡室二筵室中度以几堂
上度以筵余謂記得之於五室而謬於堂之修廣何者
當以理推之令愜古今之情也夫明堂者蓋所以告月
朔布時令宗文王祀五帝者也然營構之範自當因宜
制耳故五室者合於五帝各居一室之義且四時之

祀皆據其方之正又聽朔布令咸得其月之辰可謂施
政及祀二三俱允求之古義竊為當矣鄭康成漢末之
通儒後學所取正釋五室之位謂土居中木火金水各
居四維然四維之室既乖其正施令聽朔各失厥衷左
右之个棄而不顧乃反文之以美說飾之以巧辭言水
木用事交於東北木火用事交於東南火土用事交於
西南金木用事交於西北既依五行當從其方用事之
文出何經典可謂工於異端言非而博疑誤後學非所

望於先儒也禮記玉藻曰天子聽朔於南門之外閏月則闔門左扉立於其中鄭玄注曰天子之廟及路寢皆如明堂制明堂在國之陽每月就其時之堂而聽朔焉卒事反宿路寢亦如之閏月非常月聽其朔於明堂門下還處路寢門終月也而考工記周人明堂玄注曰或舉王寢或舉明堂互言之以明其制同也其同制之言皆出鄭注然則明堂與寢不得異矣而尚書顧命篇曰逆于釗南門之外延入翼室此之翼室即路寢矣其下

曰大貝賁鼓在西房垂之竹矢在東房此則路寢有左
右房見於經史者也禮記喪服大記曰君夫人卒於路
寢小斂婦人髻帶麻於房中鄭玄注曰此蓋諸侯禮帶
麻於房中則西南天子諸侯左右房見於注者也論路
寢則明其左右言明堂則闕其左右个同制之說還相
矛盾通儒之注何其然乎使九室之徒奮筆而爭鋒者
豈不由處室之不當哉記云東西九筵南北七筵五室
凡室二筵置五室於斯堂雖使班倕構思王爾營度則

不能令三室不居其南北也然則三室之間便居六筵之地而室壁之外裁有四尺五寸之堂焉豈有天子布政施令之所宗祀文王以配上帝之堂周公負扆以朝諸侯之處而室戶之外僅餘四尺而已哉假在儉約為陋過矣論其堂宇則偏而非制求之道理則未愜人情其不然也余恐為鄭學者苟求必勝競生異端以相訾抑云二筵者乃室之東西耳南北則狹焉余故備論之曰若東西二筵則室戶之外為丈三尺五寸矣南北戶

外復如此則三室之中南北裁各丈二耳記云四旁兩
夾窓若為三尺之戶二尺之窓窓戶之間裁盈一尺繩
樞甕牖之室華門圭審之堂尚不然矣假令復欲小廣
之則四面之外闊狹不齊東西既深南北更淺屋宇之
制不為通矣驗之衆塗略無算焉且凡室二筵丈八地
耳然則戶牖之間不踰二尺也禮記明堂天子負斧扆
南向而立鄭玄注曰設斧於戶牖之間而鄭氏禮圖說
扆制曰從廣八尺畫斧文於其上今之屏風也以八尺

床置二尺之間此之亘通不待智者較然可見矣且若
二筵之室為四尺之戶則戶之兩頰裁各七尺耳全以
置之猶自不容矧復戶牖之間哉其不然二也又復以
世代驗之即虞夏尚朴殷周稍文製造之差每加崇飾
而夏后世室堂修二七周人之制反更促狹豈是夏禹
卑宮之意周監郁郁之美哉以斯察之其不然三也又
云堂崇一筵便基高九尺而壁戶之外裁四尺五寸於
營制之法自不相稱其不然四也又云室中度以几堂

上度以筵而復云凡室二筵而不以几還自相違其不然五也以此驗之記者之謬抑可見矣盛德篇云明堂凡九室三十六戶七十二牖上員下方東西九仞南北七筵堂高三尺也余謂盛德篇得之於戶牖失之於九室何者五室之制傍有夾房面各有戶戶有兩牖此乃因事立則非拘異術戶牖之數固自然矣九室者論之五帝事既不合施之時令又失其辰左右之个重置一隅兩辰同處參差出入斯乃義無所據未足稱也且又

堂之修廣裁六十三尺耳假使四尺五寸為外之基其中五十四尺便是五室之地計其一室之中僅可一丈置其戶牖則於何容之哉若必小而為之以容其數則令帝王側身出入斯為怪矣此匪直不合典制抑亦可哂之甚也余謂其九室之言誠亦有由然竊以為戴氏聞三十六戶七十二牖弗見其制靡知所置便謂一室有四戶之窓計其戶牖之數即以為九室耳或未之思也蔡伯喈漢末之時學士而見重於當時即識其修廣

之不當而必未思其九室之為謬更修而廣之假其法
象可謂因偽飾辭順非而澤諒可歎矣余今省彼衆家
委心從善庶探其衷不為苟異但是古非今俗間之常
情愛遠惡近世中之恒事而千載之下獨論古制驚俗
之談固延多謂脫有深賞君子者覽而揣之儻或存焉
謚不飲酒好音律愛樂山水高尚之情長而彌固一遇
其賞悠爾忘歸乃作神士賦以自元延昌四年卒年三
十二遐邇悼惜之其年四門小學博士孔璠等學官四

十五人上書曰竊見故處士趙郡李謐十歲喪父哀號
罷隣人之相幼事兄瑒恭順盡友于之誠十三通孝經
論語毛詩尚書歷數之術尤盡其長州閭鄉黨有神童
之號年十八詣學受業時博士即孔璠也覽始要終論
端究緒受者無不欣其言矣於是鳩集諸經廣校同異
比三傳事例名春秋叢林十有二卷為璠等判析隱伏
垂盈百條不苟言以違經弗飾辭而背理辭氣磊落觀
者忘疲每曰丈夫擁書萬卷何假南面百城遂絕跡下

帷杜門却埽棄產營書手自刪削卷無重複者四千有
餘矣猶括次專家搜比黨議隆冬達曙盛暑通宵雖仲
舒不窺園君伯之閉戶高氏之遺漂張生之忘食方之
斯人未足為喻謚嘗詣故太常卿劉芳推問音義語及
中代興廢之由芳乃歎曰君若遇高祖侍中太常非僕
有也前河南尹黃門侍郎甄琛內贊近機朝野傾目于
時親識有求官者答云趙郡李謚耽學守道不問于時
常欲致言但未有次耳諸君何為輕自媒銜謂其子曰

昔鄭玄盧植不遠數千里詣扶風馬融今汝明師甚邇
何不就業也又謂朝士曰甄琛行不媿時但未薦李謐
以此負朝廷耳又結宇依巖憑崖鑿室方欲訓彼青衿
宣揚墳典冀西河之教重興北海之風不墜而祐善空
聞暴疾而卒邦國銜殄悴之哀儒生結推梁之慕况璠
等或服議下風或親承音旨師儒之義其可默乎事奏
詔曰謐屢辭徵辟志守冲素儒隱之操深可嘉美可遠
傍惠康近準玄晏謐曰貞靜處士并表其門閭以旌高

節於是表其門曰文德里曰孝義云

鄭脩北海人也少隱於岐南几谷中依巖結宇不交世俗雅好經史專意玄門前後州將每徵不至岐州刺史魏蘭根頻遣致命脩不得已暫出見蘭根尋還山舍蘭根申表薦脩明帝詔付雍州刺史蕭寶夤訪實以聞會寶夤作逆事不行

隋

李士謙字子約一名容郎涿郡人魏處士謚之子也士

謙髻亂喪父事母以孝聞母曾嘔吐疑中毒因跪嘗之
伯父瑒深所嗟尚每稱此兒吾家顏子也年十二魏廣
平王贊辟開府參軍事後丁母憂居喪骨立有姊適宋
氏不勝哀而死士謙服闋捨宅為伽藍脫身而出詣學
請業研精不倦遂博覽羣籍善天文術數齊吏部尚書
辛術召署員外郎趙郡王叡舉德行皆稱疾不就和士
開亦重其名將諷朝廷擢為國子祭酒固辭得免刺史
高元海以禮再致之稱為菩薩隋有天下畢志不仕自

以少孤未嘗飲酒食肉無殺害之言親賓至輒陳樽俎
對之危坐終日不倦李氏宗黨豪盛每春秋二社必高
會極宴無不沉醉誼亂嘗集士謙所盛饌盈前而先為
設黍謂羣從曰孔子稱黍為五穀之長荀卿亦云食先
黍稷古人所尚寧可違乎少長肅然無敢弛情退而相
謂曰既見君子方覺吾徒之不德也士謙聞而自責曰
何為人疎頓至於此家富於財躬處節儉每以振施為
務州里有喪事不均至相鬭訟士謙聞而出財補其少

者令與多者相埒兄弟愧懼更相推讓卒為善士有牛
犯其田者士謙牽置涼處飼之過於本主望見盜刈禾
黍者默而避之其家僮嘗執盜粟者士謙慰喻之曰窮
困所致義無相責遽令放之其奴嘗與鄉人董震因醉
角力震扼其喉斃於手下震懼請罪士謙謂曰卿本無
殺心何為相謝然可速去無為吏拘性寬厚皆此類也
後出粟萬石以貸鄉人屬比歲不登責家無以償皆來
致謝士謙曰吾家餘粟本圖振贍豈求利哉於是悉召

責家為設酒食對之燔契曰責了矣幸勿為念也各令
罷去明年大熟責家爭來償士謙拒之一無所受他年
饑多有死者士謙罄家資為之糜粥賴以全活者萬計
收埋骸骨所見無遺至春又出田糧種子分給貧乏趙
郡農人德之撫其子孫曰此李參軍遺惠也仁心感物
羣犬生子交共相乳凶年散穀至萬餘石合諸藥以救
疾癘如此積三十年或謂士謙子多陰德士謙曰夫言
陰德其猶耳鳴已獨知之人無知者今吾所作吾子皆

知何陰德之有士謙善談玄理嘗有客在坐不信佛家
報應之義士謙喻之曰積善餘慶積惡餘殃豈非休咎
邪佛經曰轉輪五道無復窮已此則賈誼所言千變萬
化未始有極忽然為人之謂也佛道未來而賢者已知
其然矣至若鮐為黃熊杜宇為鷓鴣襄君為龍牛哀為
虎君子為鵠小人為猿彭生為豕如意為犬黃母為鼃
宣武為鼈鄧艾為牛徐伯為魚鈴下為烏書生為蛇羊
祐前身李氏之子此非佛家變受異形之謂邪客曰邢

子才云豈有松柏後身化為樗櫟僕以為然士謙曰此
不類之談也變化皆由心作木豈有心乎客又問三教
優劣士謙曰佛日也道月也儒五星也客亦不能難而
止士謙平生時時為詠懷詩輒毀其本不示人又嘗論
刑罰遺文不具其略曰帝王制法沿革不同自可損益
無為頓改今之賊重者死是酷而不懲也語曰人不畏
死不可以死恐之愚謂此罪宜從肉刑刖其一趾再犯
者斷其左腕流刑刖去右手三指又犯者下其腕小盜

宜黥又犯則落其所用三指又不悛則下其腕無不止也無賴之人竄之邊裔職為亂階適所以召戎矣非求安之道也博奕淫游盜之萌也禁而不止黥之則可有識者頗以為得政體開皇八年終於家趙州士女聞之莫不流淚曰我曹不死而令李參軍死乎會葬者萬餘人李景伯等以士謙道著丘園條其行狀詣尚書請先生之謚事寢不行遂相與樹碑於墓其妻范陽盧氏亦有婦德及夫終所有贈賻一無所受謂州里父老曰參

軍平生好施今雖殞歿安可奪其志哉乃散粟五百石以賑窮乏免奴婢六十人以追其志云

崔廓字士元博陵安平人也父子元齊燕州司馬廓少孤貧而母賤由是不為鄉族所齒初為里佐屢逢屈辱於是感激逃入山中遂博覽書籍多所通涉山東學者皆宗之既還鄉不應辟命與趙郡李士謙為忘年之友時稱崔李士謙死廓哭之慟為之作傳輸之祕府士謙妻盧氏寡居每有家事輒令人諮廓取定嘗著論言刑

名之理其義甚精文多不載大業中卒於家年八十子
頤字祖濬有記辯善著述知名當時累遷至越王府長
史自有傳

徐則東海郊人也幼沉靜寡嗜欲受業於周弘正善三
元精於論議聲擅都邑則歎曰名者實之賓吾其為賓
乎遂懷棲隱之操杖策入縉雲山從學者數百人苦請
教授則謝而遣之不娶妻常服巾褐陳太建中應召來
憩於至真觀期月又辭入天台山因絕粒養性所資惟

松朮而已雖隆冬沍寒不服綿絮太傅徐陵為之刊山
立頌初在縉雲山太極真人徐君降而謂之曰汝年出
八十當為王者師然後得道也時晉王廣鎮揚州聞其
名手書召之則謂門人曰吾今年八十一王來召我徐
君之旨信而有徵矣遂詣揚州晉王將請受道法則辭
以時日不便其後夕中命侍者取香火如平常朝禮之
儀至於五更而死支體柔弱如生停留數旬顏色無變
晉王下書贊歎遣使人送還天台安葬是時自江都至

於天台在道人多見則徒步云得放還至其舊居取經
書道法分遺弟子仍令淨埽一房曰若有客至宜延之
於此然後跨石梁而去不知所之須臾屍柩至方知其
靈化時年八十二晉王聞而益異之贈物千段遣畫工
圖其狀令柳詵為之讚時有建安宋玉泉會稽孔道茂
丹陽王遠知等亦行辟穀道以松朮自給皆為煬帝所
重

張文詡河東人也父琚開皇中為洹水令以清正聞文

詡博覽羣書特精三禮高祖方引致天下名儒碩學之士文詡時游太學博士房暉遠等莫不推伏之書侍御史皇甫誕一時朝彥恒執弟子禮以所乘馬就學邀屈文詡遂每牽馬步進意在不因人自致也右僕射蘇威聞而召之與語大悅勸令從官文詡固辭仁壽末學校廢文詡杖策而歸以灌園為業州郡頻舉皆不應命事母以孝聞每以德化人鄉黨頗移風俗嘗有人夜中竊刈其麥者見而避之盜因感悟棄麥而謝文詡慰諭之

自誓不言固令持去經數年盜者向鄉人說之始為遠
近所悉隣家築牆心有不直文詡因毀舊堵以應之文
詡嘗有腰疾會醫者自言善禁文詡令禁之遂為刀所
傷至於頓伏牀枕醫者叩頭請罪文詡遽遣之因為之
隱謂妻子曰吾昨風發墮坑所致其掩人短皆此類也
州縣以其貧素將加賑卹輒辭不受嘗閑居無事從容
歎曰老冉冉而將至恐修名之不立以如意擊几自樂
其所擊皆有處所時人方之閔子騫原憲焉終於家時

年四十鄉人爲之立碑號曰張先生

鄭翻字靈雀太原晉陽人也父紹元小字安都仕齊位太尉諮議趙郡太守翻少有器識學涉好文章齊武平末位司徒記室參軍尋遇齊亡歷周隋遂不仕隱居滎陽三窟山傲誕不自羈束或有所之造乘驢衣韉破弊而往遠近欽其高名皆謂有異狀觀者如堵及見其形乃甚短陋不副所聞然風神俊發無貴賤並敬服之納言楊素聞其名因使過滎陽迎與相見言談彌日深加

禮重及歸言之朝廷累徵不至終於家

通志卷一百七十八



總校官庶吉士臣侍朝

校對官庶吉士臣陳崇本

謄錄監生臣胡先鳴